

**Kalaallit Nunaanni politimesteri nunap ilaani aalajangersimasuni immikkut akuersissuteqartarsinnaannera periarfissaqartillugu nunami maani inunnik angallassissutini biilini assakaasut quaannaveeqqutillit atoqqusaajunnaarnissaat siunertaralugu naalagaaffeqatigiinni oqartussaaffinnut saaffiginneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

**pillugu**

**Inatsisinut Ataatsimiititaliap**

**siunnersuutip aappassaaneerreqarneranut**

**ISUMALIUTISSIISUTAA**

Inatsisinut Ataatsimiititaliap suliarinninnermini ilaasortarai

Inatsisartunut ilaasortaq Anders Olsen, Siumut, Siulittaasoq  
Inatsisartunut ilaasortaq Sofia Geisler, Inuit Ataqtigiit, Siulittaasup tullia  
Inatsisartunut ilaasortaq Aleqa Hammond, Nunatta Qitornai  
Inatsisartunut ilaasortaq Anna Wangenheim, Demokratit  
Inatsisartunut ilaasortaq Stine Egede, Inuit Ataqtigiit

## **1. Siunnersuut pillugu**

Biilinit inunnik angallassissutinit assakaasut quaannaveeqqutillit atoqqusaajunnaarnissaat siunertaralugu naalagaaffimmi oqartussanut saaffiginninnissamik Naalakkersuisut siunnersuutikkut peqquneqarput, tamatumani nunap immikkoortuini aalajangersimasuni atuutsitsinninnissamik Kalaallit Nunaanni politimesteri nalunaaruteqarsinnaatillugu.

Assakaasunik quaannaveeqqutilinnik atuneq aqqusineramik nungullarsaataaginnarani peqqissutsimuttaaq ulorianartorsiortitsineramik nassataqartoq siunnersuuteqartup suinnersuumminut tunngavilersuummini tikkuarpaa. Aqqusinermi pujoralak puakkt nappaatiniinnaangitsoq aammattaarli uummatikkut taqqatigullu nappaatinik pilersitsisartuusorineqarpoq.

Siunnersuuteqartoq 2018-imi misissuinermit innersuussivoq, tassani takutinneqarpoq biilinu inunnik angallassissutinu assakaasut quaannaveeqqutillit Skandinaviami atorneqarnerat, inunngornermiit toqussaq tikillugu isigissagaanni, inuunernik sivitsorsaataasimanerminut sanilliullugu inuit malunnaatilimmik ukiunik ikinnerusunik inuuffeqartarsimasut. Siunnersuut biilinu inunnik angallassissutinu assakaasunik quaannaveeqqutilinnik atuisarnermut taamaallaat tunngatinneqarpoq. Ataatsimiititaliali paasinninnera malillugu inerteqquteqarnerup angallassissutinu allanut aamma atuutsinneqalersinnaanera siunnersuutikkut mattunneqanngilaq. Lastbiilit qamutillu assakaasullit oqimaatsut allat biilinu inunnik angallassissutinu sanilliullutik aqqusinernik 10.000-eriaammik nungullartitsinerusartut Naalakkersuisut akissuteqaamminni tikkuarpaat. Tamanna tunngavigalugu assakaasunik quaannaveeqqutilinnik atuinermut inerteqquteqarsinnaaneq aamma assersuutigalugu lastbiilinu atuutsinneqartariaqarnerisumaliutigineqarsinnaavoq. Qamutinu taamaattunut aqqusinikkut angallannermi isumannaallisaanikkut mianersorfissanik immikkut ittunik atuuttoqarnerisumaliutigineqarsinnaavoq.

Assigisaanik biilit inunnik angallassissutit immikkut ittut, assersuutigalugit politiit biiliisa assakaasunik quaannaveeqqutitalinnik atueqqusinnigissinnaanermut ilaatinneqannginnissaat pisariaqarnerisumaliutigineqarsinnaavoq.

Siunnersuut malillugu politimesteri, sumiiffimmi pissutsit immikkut ittut atuuppata, matumani aamma aqqusineqarnermi pissutsit tamanna innersuunnartippassuk nunap ilaani sumiiffinni aalajangersimasuni immikkut akuersissuteqartarsinnaavoq.

## **2. Naalakkersuisut akissuteqaataat allannguutisssatullu siunnersuutaat**

Naalakkersuisut akissuteqaamminni oqaatigaat inerteqquteqarsinnaaneq, illuatungaani quaannaveeqqutit angallannermi isumannaallisaanermut sunniutaat illuatungaani ilaatigut aqqusinermik nungullarsaanikkut silaannarmillu mingutsitsinikkut sunniutaat ajortut illuatungeriisillugit oqimaatigiissaaraluni suliaasariaqartoq.

Qanoq sunniutit ajortut suniutinit ajunngitsunit annertunerutiginerannik aalajangiussineq nunami maani pissusiviusunik misissuinermit tunngaveqartariaqarpoq. Kingunissat allatullu iliuuserineqarsinnaasut sukumiisumik misissorneqartariaqarput.

Tamanna tunngavigalugu aalajangiiffigisassatut siunnersuummut allannguutissatut siunnersuut una Naalakkersuisunit saqqummiunneqarpoq:

*”Angallannermi isumannaallisaanermut sunniuteqanngitsumik aqqusinernik nungullartitsisarnermik silaannarmillu mingutsitsinermik annikillititsinissamat periarfissanik misissuinissaq siunertaralugu naalagaaffeqatigiinni oqartussaaffinnut saaffiginneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.”*

### 3. Inatsisinut Ataatsimiititaliap oqaaseqaatai

Assakaasunik quaannaveeqqutilinnik atuineq aqqusineq quasatsillugu aqqusinnermut tunngalluarnerusinnaanermik unikkasuarsinnaanerunermillu nassataqarpoq, taamaalillunilu aqqusinikkut angallannermi isumannaallisaanermut sunniuteqarluni.

Assakaasunilli quaannaveeqqutitalinnik atuineq aamma pitsaanngitsunik nassataqarpoq: Ilaatigut aqqusinnermi malunnaatilimmik nungullarsaanermik taamaalillunilu aqqusernit aserfallatsaalinerannut annertuunik aningaasartuuteqarnermik. Ilaatigullu peqqissutsimik innarliisinnaasumik silaannarmik mingutsitsinnermik.

Apeqqutaavorli ajoqutaasut pitsaaqutinit annertunerunersut.

Siunnersuuteqartoq siunnersuummut tunngavilersuummini Norgemi misissuisimanernut marlunnut, tamarmik Norgemi illoqarfinni arlalinni assakaasunik quaannaveeqqutitalinnik atuiunnaarnerup nassataanik aqqusinikkut angallannermi ajutoornerit 0,5 %-it inorlugit amerlisimanerannik kiisalu inuit ajoqusernerannik nassataqartumik ajutoornerit 2%-it 3%-illu akornannik amerlisimanerannik takutitsisunut innersuussivoq.

Politiit ukiumoortumik kisitsisitigut paasissutissaataat naapertorlugit politiit 2018-imi aqqusinikkut angallannermi ajutoornerit 138-t nalunaarsorsimavaat, taakkunannga 58-it inuit ajoqusernerannik nassataqarsimapput. Taamaalilluni Norgemi misissuisimanerit inernerit tunngavigissagaanni Kalaallit Nunaanni assakaasunik quaannaveeqqutitalinnik atuinermik inerteqquteqarlunnalernerup aqqusinnermi angallannikkut ajutoornerit ukiumut marluk inorlugit amerleriarnernannik nassataqarnissaa naatsorsuutigineqarsinnaavoq. Aqqusinikkut angallannermi ajutoornerit inuit ajoqusernerannik nassataqartut eqqarsaatigalugit ukiumut ajutoornerit marluk sisamallu akornannik amerleriaateqassapput.

Taamaalilluni assakaasut quaannaveeqqutitalit assakaasunut ukiorsiutinut quaannaveeqqutitaqanngitsunut sanilliullutik aqqusinikkut angallannermi isumannaallisitsinerat annikiginarsinnaavoq.

Norgemili misissuinerit inernerinik imaaliinnarluni Kalaallit Nunaannut nuussisoqarsinnaanersoq apeqqutaavoq.

Norgemi misissuinerit illoqarfiit Oslo, Drammen, Stavanger, Bergen kiisalu Trondheim ilaatinneqarsimapput. Assakaasunik quaannaveeqqutitalinnik atuinernup aqqusinikkullu angallannermi ajutoornerit amerlassusiisa ataqatigiinnerisa aamma nunami maani

atuussinnaaneranut pissutsit arlallit apeqqutaassapput, minnerunngitsumik silap pissusaa aqqusinermilu pissutsit.

Assakaasunik quaannaveeqqutitalinnik atuinnermut inerteqquteqalernerup qanoq annertutigisumik aqqusinermi angallannikkut ajutoornerit amerlanerulernerannik aamma nassataqarsinnaaneranut qanoq aqquserngit siorarterneqartiginerat apeqqutaassagunarpoq. Tassunga atatillugu eqqumaffigineqartariaqarpoq aamma aqqusinernik siorarterineq peqqissutsimik innarliisumik aqqusinermi pujoralaqarneranut sunniuteqaqataasinnaasoq naatsorsuutigisariaqarmat.


Inatsisinut Ataatsimiititaliap maluginiarpaa Naalakkersuisut kaammattuutigigaat, inerteqquteqarsinnaanermik aalajangiinnginnermi kingunissat allatullu iliuuserineqarsinnaasut sukumiisumik misissorneqartariaqartut. Naalakkersuisut allannguutissatut siunnersuutaat tamanna tunngavigalugu isigineqassaaq.

Angallannermi isumannaallisaanermut sunniuteqanngitsumik aqqusinernik nungullartitsisarnermik silaannarmillu mingutsitsinermik annikillititsinissamut periarfissanik misissuinissaq siunertaralugu naalagaaffimmi oqartussaasunut saaffigineqqullugit Naalakkersuisut allannguutissatut siunnersuutikkut peqquneqarput.

**4. Inatsisinut Ataatsimiititaliap inassuteqaataa**

**Ataatsimiititaliap isumaqatigiittup** Naalakkersuisut allannguutissatut siunnersuutaata akuersissutigineqassasoq inassutigaa.


Inatsisinut Ataatsimiititaliap taama oqaaseqaateqarluni siunnersuut aappassaaniigassanngortippaa.



Anders Olsen  
Siulittaasoq  
*Siumut*




Sofia Geisler  
*Inuit Ataqtigiit*



Anna Wangenheim  
*Demokraatit*



Stine Egede  
*Inuit Ataqtigiit*



Aleqa Hammond  
*Nunatta Qitornai*